



Savjeti za činjenje dobrih djela i ostavljanje grijeha (Meka)

Hatib: dr. Abdullah ibn Avad el-Džuheni

3. ševval 1445. po Hidžri / 12. april 2024.

Hvala Allahu na zaštiti i uputi, i hvala Mu na pomoći i obilnim darovima. Svjedočim da nema boga osim Allaha, Jedinog, Koji nema druga, Darežljivog, Plemenitog, Gospodara, Blagog, Milostivog, i svjedočim da je naš vjerovjesnik Muhammed, sallallahu alejhi ve sellem, Njegov rob i poslanik, najbolji čovjek koji je klanjao, postio i bdio noću u ibadetu dok su drugi ljudi spavali, neka su na njega, na njegovu porodicu, ashabe i one koji ih slijede u dobročinstvu Allahov blagoslov, mir i spas.

Allahovi robovi, bojte se Allaha Uzvišenog, pokoravajte Mu se u onome što vam je naredio, ostavite ono što vam je zabranio, zahvaljujte Allahu na blagodatima koje vam je dao i darežljivosti, On vas je uputio da ispostite ramazan, njegove noći provedete u ibadetu i ostvarite svoje želje njegovim upotpunjenjem.

Blago onima koji su postili i klanjali, s čvrstom vjerom u Allaha i nadom u Njegovu nagradu.

Blago onima koje je Allah počastio dostojanstvom i slašću dozivanja Njega.

Blago onima koji su se oslobodili "tereta", očistili od grijeha i klonili se besposlice, rekla-kazala i jasnog grijeha.

Blago onima koji su se pokorili svome Gospodaru, pokazali poštovanje prema mjesecu ramazanu i bili iskreni prema Stvoritelju.

Ustrajte u pokornosti Allahu, Allah vam se smilovao, u svakom vremenu i na svakom mjestu, i nemojte pomutiti čistoću dobrih djela, dobra i dobročinstva koje ste učinili u ramazanu, i vratiti se lošim djelima, pokornosti šejtanu, grijesima i neposlušnosti, jer onaj ko pokvari svoja djela, nakon što ih je popravio, ide putem odbacivanja, uskraćivanja, neprihvatanja i poniženja. Gospodar ramazana je Gospodar ševvala i





ostalih mjeseci, i On prezire nepokornost i grijeh u svakom vremenu. Stidite se Allaha i budite svjesni Njegovog nadzora, On vas vidi, i zna ono što tajno i javno radite. "Eto, oni grudi svoje okreću sa željom da se od Njega sakriju. A i kad se u ruho svoje umotavaju, On zna ono što skrivaju i ono što pokazuju – On, uistinu, zna misli svačije." (Hud, 5)

Vjerovjesnik, sallallahu alejhi ve sellem, pozivao je ljude da ustrajavaju u činjenju dobrih djela. Aiša, radijallahu anha, kazala je: "Kada bi Poslanik, sallallahu alejhi ve sellem, počeo činiti neko djelo, ustrajao bi u tome. Ako bi prespavao noćni namaz ili ga propustio zbog bolesti, onda bi u danu klanjao dvanaest rekata."

Mesruk, Allah mu se smilovao, rekao je: "Upitao sam Aišu, radijallahu anha: 'Ko je djelo bilo najdraže Allahovom Poslaniku, sallallahu alejhi ve sellem?', a ona je odgovorila: 'Ono u čijem se činjenju ustraje.'" (Muttefekun alejhi)

Aiša, radijallahu anha, klanjala je osam rekata duha-namaz, a zatim je kazala: "Da mi sada ožive roditelji, ne bih ih izostavila." (Malik)

Ustrajavanjem u činjenju dobrih djela čovjek postiže Allahovu ljubav i zaštitu. Uzvišeni kaže: "Allah zaista voli one koji se često kaju i koji se mnogo čiste." (El-Bekara, 222) Poznati učenjak Sa'di, Allah mu se smilovao, rekao je: "Allah voli one koji se ustrajno kaju za svoje grijeh i one koji se mnogo čiste od grijeha."

Bojte se Allaha, Allahovi robovi, i znajte da su ove noći i dani, mjeseci i godine "vodiči" do smrtnog časa i vrijeme za činjenje dobrih djela. Oni vas uporno i polahko vode ka vašem smrtnom času, i riznice su vaših djela, i dobrih i loših, i zato nastojte da ih ispunite djelima koja će svjedočiti u vašu korist.

Utječem se Allahu od prokletog šejtana! U ime Allaha, Milostivog, Samilosnog! "... i sve dok si živ, Gospodaru svome se klanjaj!" (El-Hidžr, 99)

Znajte da je veliko Allahovo dobro prema ovom ummetu, podizanje njegove deredže kod Njega i ukazivanje posebne počasti prema njemu, među ostalim narodima, ogleda u tome što ih obasipa Svojim dobrima i prilikama za činjenje dobrih djela tokom cijele godine, a jedna od tih prilika jeste propisivanje posta šest dana ševvala,





za koje je Poslanik, sallallahu alejhi ve sellem, rekao: "Ko isposti ramazan i šest dana ševvala, poslije njega, imat će nagradu kao da je postio cijelu godinu."

Požurite s postom ovih šest dana i s činjenjem dobrih djela i pokornosti Allahu, džellešanu. "Gospodaru naš, ne dopusti srcima našim da skrenu, kada si nam već na Pravi put ukazao, i daruj nam Svoju milost; Ti si, uistinu, Onaj Koji mnogo daruje!" (Ali Imran, 8)

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

